

VRATNICE – Predvorje i kult mrtvih vladara Bosanske doline piramida

Piše: Prof. Dr Muris Osmanagić

Sarajevo

e-mail: omuris@bih.net.ba

Čudesna planetarna vizija Semira Osmanagića, istraživača nestalih civilizacija, o postojanju gigantskog piramidalnog kompleksa neviđenih razmjera, u Visočkoj dolini, u samom geografskom i historijskom središtu Bosne i Hercegovine, na ušću rijeke Fojnice u Bosnu, počela se efektno da ostvaruje, iznad očekivanja, pod njegovim neposrednim rukovođenjem, u drugom kvartalu 2006. godine.

Desetine hiljada posjetilaca penjali su se proteklih mjeseci uz brda Visočicu i Plješivicu, sada već nadaleko poznatih u svijetu kao piramide Sunca i Mjeseca, oduševljeno gledajući vlastitim očima upečatljive brojne dokaze o postojanju tih piramida.

Isto takvo oduševljenje zahvatalo je privilegirane eksperte i novinare, koji su mogli ući u zaključani tunel Ravne – piramida Sunca i provlačiti se četveronoške, stotinama metara uskog tunela, 18 metara ispod zemlje, pa doći do fascinantne dvije debele megalit ploče od izlivenog sitnozrnog pješčara neobičnih oblika, ispod debelog sloja breče, sa urezanim skupovima nepoznatih simbola, koji – po mišljenju istraživača i autora ovog rada, predstavljaju dijelove prvog prahistorijskog evropskog i protobosanskog pisma.

U svojoj prospekcijskoj ekspediciji tunela Ravne, u okviru utvrđenog Programa istraživanja za 2006. godinu Fondacije BPS*, ove ogromne i veličanstvene arheološke artefakte, čije su dimenzije daleko veće od samog profila tunela, otkrila je u mraku, jedva vidljive pri dnu zida tunela, grupa rudarskih specijalista iz Zenice. Ova grupa entuzijasta, volontera i stručnjaka, radeći vikendima tokom mjeseca aprila 2006 godin, pažljivo ih je otkopavala u skučenom prostoru i podgradila rudarskom podgradom da se sačuvaju od urušenja stijena breče, kroz koje je tunel ručno rađen bez podgrade. Odmah u maju 2006 stavljeni su na uvid stručnoj javnosti. To je jedno od najvećih otkrića u arheologiji Evrope i zaslužuje u tom smislu odgovarajuću pažnju i zaštitu. Javnost je o tome samo djelimično i sasvim nedovoljno upoznata.

Sada se nenadmašna vizija Semira Osmanagića i aktivnost Fondacije BPS, čije je osnivanje i registraciju na nivou Bosne i Hercegovine on inicirao, kao nepolitičku i neprofitnu organizaciju za zaštitu kulturno-historijskog blaga, proširuje se dalje, pet kilometara jugoistočno od piramide Sunca, prema Sarajevu, na području sela Vratnice, kuda prolazi lokalni uski asfaltni put, nekadašnja kaldrma, koja je povezivala grad Fojnicu i Kraljevu Sutjesku. To je vrlo živopisna dolina. Odmah iznad sela izdiže se osrednje brdo, sa čudnim, neslavenskim imenom **Toprakalija** koje, po našem mišljenju, krije unutar sebe hipotetični tumulus - mističnu grobnicu prahistorijskih vladara Bosanske doline piramida, iznad koje djeluje jako magnetsko polje.

Da li je ta hipoteza tačna, ili je tu još nešto krupnije? Svakako, ovo je veliki izazov za istraživače.

* BPS – Fondacija „Arheološki park Bosanska piramida Sunca“



Sl. 1.
Izgled sprijeda brda Toprakalija prije početka istraživačkih radnji (Foto: Muris Osmanagić 10. jul 2006)



Sl.2
Detalj djelimično otkopane kamene strukture na gornjoj stepenici brda Toprakalija (Foto: Islam Cero, 20. juli 2006)



Sl. 3.
Djelimično otkopana kamena struktura na Gornjoj stepenici brda Toprakalija (Foto: Admir Tatar, 20. jul 2006)



Sl.4
Detalj otkopanog popločanog platoa, sa trostepenim mozaik pločama, po 12 cm debljine, na sjevernoj strani brda Toprakalija (foto Islam Cero, 20. juli 2006)

Brdo Toprakalija (Sl.1) na izgled je obično brdo. Sprijeda, sa zapadne strane je polukružnog oblika, prečnika cca 140 m, sa nisko obraslom travom i ponekim žbunom. Na njemu nema šume, kao na okolnim brdima. Vidljive su četiri uske travnate stepenice, koje opasuju brdo. Zimi se snijeg brzo otopi na njemu, za razliku od ostalih brda.. Mještani su sa njegovih ivica povadili dosta velikih kamenih ploča za gradnju kuća.

To su bile neke indikacije za nas, ukazujući da to nije obično brdo. Ali trebalo je pronaći prve opipljive elemente na kojima bi se zasnivao odgovarajući projekat

istraživanja i zatražila saglasnost za istraživanje od nadležnih državnih organa.. Zato su mještani, uz saglasnost privatnih vlasnika zemljišta i konsultaciju sa projektantom, dobrovoljno napravili prve raskope na terenu. Oni su te raskope, zaštitili sa žutom trakom, kao što pokazuje slika 4.

Zahvaljujući vrijednim mještanima i njihovom rukovodiocu Admiru Tataru, pred očima svih, ispod tankog sloja zemlje od 0,80 m, izronio je dio kamene strukture, hiljadama godina sakriven, zadivljujući po svojoj ljepoti, geometrijskih oblika i vezivnih linija, koje su opasivale brdo, kao i poprečnih linija, koje su odlazile u dubinu brda. Pojedini kameni blokovi, dugački između 2,0 – 4,0 metra, široki između 1,0 – 1,5 m i debeli svaki po 0,55 m, bili su od sitnozrnog pješčara, vrlo tvrdi, da su ličili na izliveni čeliko-beton. Gornja površina blokova imala je vrlo ravnomjeran mozaik sa udubljenjima.

Kompasom je izmjerena orijentacija podnožja i sredine brda. Ali na vrhu brda kompas je potpuno stao. Neka jaka magnetska sila spriječila ga je da funkcioniра.

Sve navedene indikacije i elementi bili su dovoljni da se završi Projekat sistematskog istraživanja ovog izazovnog područja i ponudi Upravnom odboru Fondacije BPS 21. jula 2006. da ga uključi u svoj Program istraživanja, kao Anex za drugu polovinu 2006. godine, zajedno sa prijedlogom kompetentnog Stručnog štaba za upravljanje Projektom. Na svojoj sjednici 01. avgusta 2006. Upravni odbor Fondacije prihvatio je taj prijedlog i zatražio od nadležnih državnih organa saglasnost za takav program istraživanja.

U programu istraživanja predviđena je primjena kombiniranih geofizičkih metoda za preliminarnu identifikaciju geoloških i eventualnih vještačkih struktura unutar brda Toprakalija, što će pomoći preciznijem usmjeravanju istražnih radova u narednim mjesecima.

Ne samo to.

Sa dobro postavljenom organizacijom, uz minimalnu podršku Fondacije BPS Očekujemo da će do kraja 2006. godine brdo Toprakalija pokazati svoj pravi arheološki potencijal i možda, takođe, pripomoći da se razjasne neka suštinska pitanja čitavog piramidalnog kompleksa!

Sarajevo, 10. august 2006.

Napomena – slijede priloge na Web site: www.piramidasunca.ba:

2. Otkriće megalit ploče T-1 u tunelu Ravne – Piramida Sunca, sa slovima prvog prahistorijskog evropskog, odnosno protobosanskog pisma;
3. Otkriće megalit ploče T-2 u tunelu Ravne – Piramida Sunca, sa prahistorijskim reljefom Bosanske doline piramida i kultom zmije;